

## Ebe onuzi-eva ni iPo<sup>lu</sup> o keke ghi ITimoti

<sup>1</sup> Mhemhe iPo<sup>lu</sup> ni mhi khi aghiusomhi na keke oyi iJesu iKirisiti abi o ghole Eshinegba shi. Mhemhe mhi keke ebe ona. Mhemhe ni o ghie mhi ka ri agbo ni o la iJesu iKirisiti ni Eshinegba o ro shobo na awa tse abo guele.

<sup>2</sup> ITimoti mhi keke ebe ona ghi. Okhale ali ilelemhi ali opfomhe eyi Eshinegba ali eyi iJesu iKirisiti Onomhue oyawa e ka khi eye.\* <sup>3</sup> Mhi tse Eshinegba ni mhi ri udu no pfuase e ga abi eni e bia mhe e li ga. Eri mhi a tse Eshinegba uwegbe ini mhi la iromhi isoso sato e egbe, ele-iyose ali ele oguota. <sup>4</sup> Mhi aa sato evie oye, mhi aa nono ni mhi me e, egheghe agho ni oghela oyemhe o vo. <sup>5</sup> Mhi aa sato egbegbi irudunga ni u mhue. Irudunga onabi inyinye o mhue ikhi iLoisi ali ni inyeyi Yunisi o li mhue. Mhi mie shi o khi oni irudunga o li le egbe.† <sup>6</sup> Irari ona, mhia ye e ude u guise isomhopfa ni Eshinegba o ro ne le ke gbe akanya egbegbo, eni u mie abi mhi ro ri abo nge ukhomhi. <sup>7</sup> Irari khi Eshinegba o ri ayemhe ulishi na awa, ama ayemhe ekpabo ali inono ali igue ri egbe kia.

<sup>8</sup> Itobo ona, khi ze ni omama o mue ni u ro pfi otsela na Onomhue oyawa, wekhi omama mhe ni mhi khi oghumha itobo iKirisiti. Ama kuma mhe o shi osoli imeme shi iri usomhi onete tsabo, rote ekpabo oyi Eshinegba, <sup>9</sup> ni o tsumhi awa, o lu awa

\* **1:2** Li ze Ika 16.1 † **1:5** Li ze Ika 16.1

ni awa nu ọli la agbọ ipfuase ni o khia khi ọa khi irari emhikhoghuo ni awa rieḷe, ama abi ọ li gba li ali irari okhale oyọli. Eri a li oni okhale ona na awa rọte obọ oyi iJesu iKirisiti neni eghẹghẹ o gba eke le. <sup>10</sup> Ama mena, a she rọli khasẹ awa rọte ibhale oyi Omiepfuese, iJesu iKirisiti ni ọ pfueche eghuli-a, ali ni ọ ri agbọ bhale, ni ọ rọte usomhi onete ri agbọ ni ọa ya ghu khasẹ gboo. <sup>11</sup> Oni usomhi onete ona Eshinegba ọ zẹ mhe shi mhi ke guele abi aghiusomhi na keẹ oyi iJesu, ali oni ọọ sese. †  
<sup>12</sup> Itobọ ona o zẹ ni mhi rọ mẹ osue abi mhi li ena. Abi o tseku li, omama ọa mu mhe irari khi mhi lese oni mhi miesuọ ali khi mhi mie shi ọ khi ọ dobe ya ri ẹloe khu emini mhi rọnga li obọ shi ogbe ni ẹleghọ.

<sup>13</sup> Emini u rọte unu oyemhe suọ, mu we mhọli ni e khi ẹte-awẹ ni u rọ ya ke sese oseḷe ni o dala. Gbo sato ke la elemhi irudunga ali inono ni u mhue elemhi iJesu iKirisiti. <sup>14</sup> Ri ẹloe khu oseḷe onete ni a rọnga e obọ, rọte ikpaghiobọ oyi Ayemhe-no-pfuase ni ọ nu awa la ini ogbọ khi dobe pfi ọli ukhomhi kpọke.

<sup>15</sup> U lese khi egbokpa ni e la eke Esha e she mẹ mhe na, li shi iFigelusi ali Emogenesi.

<sup>16</sup> Eshinegba ọ ka mhue ilelemhi na unuekpe oyi Onesiforosi, irari khi eri ọ ri egbe e mu mhe eghẹghẹ kpa, ọa na omama iwẹghẹ ni a sọ mhe. <sup>17</sup> Ni mhi rọ ma ọ, abi ọ rọ bhale iRomu, ọ nono mhe ya ramhi ni ọ rọ mẹ mhe. <sup>18</sup> Eshinegba ọ ka zẹ ni ọ mẹ ilelemhi oyi Eshinegba ogbeḷe ẹleghọ. U ga

---

† **1:11** Li zẹ 1 iTimo 2.7

leşe gboo abi o li kpaghie mhe obo abi mhi ro la Efesosi.

## 2

### *Abi a lie khi Okholi-okhue oyi iJesu iKirisiti*

<sup>1</sup> ITimoti omimhe, ze ni u toto shi okhale ni o rote obo oyi iJesu iKirisiti bhale. <sup>2</sup> Emini u suo khi mhi ngme ukpeloe otsela ebubu, rewe nga egbo ni a dobe ri egbe e nga obo, ni e ya dobe sese egboese. <sup>3</sup> Nu mhe ri egbe mie osoli abi okholi-okhue onete oyi iJesu iKirisiti. <sup>4</sup> Ogbó ni o o gbe akanya okholi-okhue, o a ya ku abo lo emhi agbo, irari khi oga oyoli o o ke dua ni loli ri egbe ke mu. <sup>5</sup> Igho o li khi, ini ogbo o kuma eni e ya na, aa ya rughu oli arula oghie khi o lo owa, ini o a li deba ushi ni o la unamhi. <sup>6</sup> O ti ni oghiale ni o toto obo gbe akanya, o kpe khi onodode ni o le emhi ekomhi ni o gua. <sup>7</sup> Sa shi emini mhi ngme ena irari khi Onomhue o ya re lese udi emhi ena nya.

<sup>8</sup> Sato iJesu egbe ni a rote eghuli guise le, ni o khi unuekpe oyi iDefidi. Onana o khi usomhi onete ni mhi ro a tse abo, <sup>9</sup> ni o re mhe a me osoli ramhi ni a ro ri igha shi mhe abo abi ogbo usueso-akhue. Ama, ungmehi oyi Eshinegba o a ze e so igha. <sup>10</sup> Irarigho, mhi ro ri egbe mie emhikpa irari egbo ni Eshinegba o ze ni wewe e li mie imiepfuese ni o te obo oyi iJesu iKirisiti bhale, li shi ufumhi na agboagbo.

<sup>11</sup> Egbegbi ungmehi ni a ri egbe a da na.

Ini awa nu oli ghua,

awa gbo li ya nu oli la agbo.

<sup>12</sup> Ini awa ri egbe mie,

awa ya nu ọli ke mhẹsẹ.  
 Ini awa kie ọli,  
 Ọ ya kie awa.\*

13 Ini awa a ya gbe akanya  
 te ode igesikia,  
 Ọna igesikia ọ kiele khi.  
 Irari khi ọa ya kie egbọli.

*Ọgbakanya ni ọ ghọle Ẹshinẹgba*

14 Ke yele ẹgbọ eye enana le. U gbo tse agua ye we ukpeloe Ẹshinẹgba, e khi wola shi ingmemhi, ni ọa mhọli eleli, eri o lesẹ ẹ yese eni e suọ ọli-a.

15 Roshẹka ni u ri egbee na Ẹshinẹgba abi, ọgbakanya ni ọ mie ni omama ọa ya mu, ni ọ guẹ ẹ sesẹ ungmehi igesikia. 16 Nuata shi ingme afue ni ẹa mhọli eleli, irari khi ẹgbọ ni ẹ sọ egbe ingme eghoghọ, eri ẹ ri ẹgbọ nuata shi Ẹshinẹgba ọ. 17 Osese oyewe, o ya ke ge abi ugboko. Ẹgbọ eghoghọ khi Ameneusi ali iFiletusi. 18 E she zobe ode igesikia obọ. Ẹ khi irote eghuli gualo o she bhale ya dose, e yese irudunga oyi ẹgbọ eghuo-a. 19 Abi bi o tseku li, irogbekẹ ni Ẹshinẹgba ọ rọ gbe eri o migha gbaa, ni a keke ena rọ shi ọli ọlele khi: “Ọnomhue ọ lesẹ ẹgbọ ni e khi eyọli.” Ali, “Ọnini ọ da guele khi oyi Ọnomhue lolu khi ne, ọ mema ya ti egbe okholo iriele le.”†

20 Ukpokpomhi owa ọa lesẹ mhue itasa igolu ali eyi elomho tse, ama o li mhọli eyi ẹera ali eme, eghuo, e khi eni e mu eloe, eghuo, e khi eni ẹa mu eloe. 21 Ini ọgbọ khuẹse egbọli-a pfuase lase emhi ebe le, a ya roli riẹle egbegbi emhi. A roli pfuase,

\* 2:12 Li ze iMat 10.33; iLuk 12.9 † 2:19 Li ze iNọba 16.5

ọga ọyọli ọ rọli li emhi, ali khi ọ ya rieḷe ọli shi oni a rọ ke gbe ikanya enete.

<sup>22</sup> Mẹ ọghuẹmḡe ebe oyi ozele na, ke na khu iguẹngeli ali irudunga, ali inono ali opfọmḡe. Kuma ẹgbọ ni e ri udu ni o pfuase ẹ lu eva oyi Onomḡue ọ.

<sup>23</sup> Khi mḡoli emini u ri ekhako ọyegḡe ali umhalese li, irari khi u lese khi uwola ẹ pfi. <sup>24</sup> Oni ọọ ga Eshineḡba ọa gbudu wola. Ọ mema khi oni ọọ rieḷe isomhelemhi deba ọgbọkpa, ọ khi ọsesẹ ọnete ni ọ ri abọ ọ mudu. <sup>25</sup> O ri ọfiẹ sese eni ẹ nu ọli khako. Ọ mḡoli ọli shi udu khi Eshineḡba ọ ya khueghie ode-a na we rọ mu pfi ni o ya rewe bhale ya lese igesikia, <sup>26</sup> ali khi ẹgbhali oyewe o ya tiemhile, e na pfue igha ni ọkphaghie ọ kpẹ khe we. Oni ọ she mu we ighumha e ke rieḷe ọghuẹmḡe oyọli.

### 3

#### *Angeli oyi ẹgbọ ikpukhokho agbọ*

<sup>1</sup> Ke bino ọli khi ẹghẹḡe ọmunu o ya la ọ ogbeḷe ni e kpe ukhokho. <sup>2</sup> Ẹgbọ e ya ke nono ingme oyi egbe wewe-ghuo tse, e mḡoli ọghuẹmḡe ebe na ukpagḡo, ẹẹ tonu obọ udu, ẹẹ titiegbe, ẹẹ weghie ẹgbọ, ẹẹ rieḷe umha-sueso deba eni e bia we, ẹa mḡoli itsuwegbe wekhi itsobode, e khi ẹgbọ ni ẹa mu ekpe na emhi Eshineḡba. <sup>3</sup> Ẹa mḡue isomhelemhi, ẹa mḡue igbekua na ọgbọ, e ri unu ẹ pfueḡe ẹgbọ-a, ẹa mḡoli iguẹ-regbekia, wekhi ilelemhi, ẹa nono eminente. <sup>4</sup> E ri egbewe ẹ de, ẹẹ li umumume, ẹẹ ti ipfuabọ nga, e mḡoli ọghuẹmḡe na agbọ ilili, ocho ni e kha rọ mḡoli inono na Eshineḡba. <sup>5</sup> Ẹ rieḷe abineḡ khi eri e miesuo, ama e kie ekpabọ ni o la imiesuo. Khi mḡoli emini u ri ẹgbọ eghogḡo li.

<sup>6</sup> Egbọ eghoghọ e bẹna lo owa deba ikpotso ni ẹa mhue ẹgbhali, eni usamhi oyi olamhe eyewe enedio ẹ nase, ali ni oghumhe khi oghumhe o o gua. <sup>7</sup> Eri ikpotso eghoghọ ẹ nono ni e wẹna, ama ẹa dobe ẹ lese igesikia. <sup>8</sup> Ezeze abi iJanesi ali iJabiresi e mu okhue vule shi iMosisi o, igho eni egbo ena e li mu okhue vule shi igesikia o. Egbọ ni o khia khi usamhi oyewe o a ke a gbe akanya ni e she de ode irudunga-a.\* <sup>9</sup> Ama ẹa ya kia nuata, itobo khi oyeghe oyewe o ya ri egbe khasẹ ogbokpa, abi o ke li eni emose aava egho egbe.

*Omhesẹ ni iPolu o ro na iTimoti*

<sup>10</sup> Ama u she lese osese oyemhe nya ali abi mhi lie ngeli, U lese emini mhi la agbo shi, u lese irudunga, ali irabomudu ali inono ali iregbemie eyemhe. <sup>11</sup> U lese okholi ni a mu vule shi mhe o, ali osoli ali emini mhi me egbe obini eoli Atioki, ali eoli iKoniomu ali eoli iLisitira. Okholi oniemhi a mu vule shi mhe o ni mhi ri egbe mie. Ama Onomhue o rue mhe o le nya.† <sup>12</sup> Egbegbo lo khi, ogbokpa ni o da nono ni lue la agbo ipfuase oyi iJesu iKirisiti ne, a ya mu okholi vule shi oli o. <sup>13</sup> Egbọ okholo ni ẹ ri egbe we khi emini ẹa fute e ya ke ri ele onobe ke khi ma o, ẹ di egbo, a lili ẹ di we. <sup>14</sup> Ama ye ye oye, toto obọ emini u wẹna ni u she mie shi, irari khi u lese obọ oyi eni u te wẹna we, <sup>15</sup> Ali abi u te rote omofe lese Ebe-no-pfuase ni e dobe ya re khili olesingme shi irudunga ni u mholi na iJesu iKirisiti ni u khi oni a mie pfuese. <sup>16</sup> Emini a keke shi Ebe-no-pfuase nya, ungmehi oyi Eshinegba lo. E ti ni a ro o sese

\* **3:8** Li ze Okiali 7.11 † **3:11** Li ze Ika 13.14-52; 14.1-7,8-20

emini e khi igesikia, ali ni a rọ ọ tse agua ye ọgbọ shi iriẹlẹ dọ-a, ali ni a rọ ọ sheshe ọgbọ shi ode rọte umhaguẹli, ali ni a rọ ọ sese ọgbọ iguẹ-ngeli. <sup>17</sup> Ni rọ a bhale ya ẹ khi a sese Omose oyi Eshinẹgba egbegbo ni ọ guẹ ke gbe ikanya enete ọdọda.

## 4

<sup>1</sup> Ukpeloe oyi Eshinẹgba ali iJesu IKirisiti, ni ọ ya gue ẹgbọ ni e laọ ali eni e ghu-a ẹzọ, ali oni ọ bhale ya mhese abi Oghie, mhi la ri oni omhese onana ne. <sup>2</sup> Ke tse abọ oni ungmehi, ke mu egbe ẹghẹghẹ kpa ni u rọ ke tse ọli, o khi ẹghẹghẹ ni o ti, o ke khi ẹghẹghẹ ni ọa ti, ke sheshe ẹgbọ, wa dese wẹ ali u ri udu ẹ shi wẹ ọ. U ri iregbemie ri ofiẹ sese wẹ. <sup>3</sup> Irari khi ẹghẹghẹ ọdọ bhale ni ẹgbọ ẹa ke rọ ya ri esọ shi egbegbi osese. Ama ni e ba ke suọ emini ẹ ti wẹ esọ, e ya ri ochoghọ ti esese gbili gasẹ egbe ni e ya ke ngme emini esọ ni ẹ riele wẹ ẹ nono ni wewe e ke suọ. <sup>4</sup> E ya rue esọ egbegbi ungmehi le, e ri esọ shi okhe nedẹ. <sup>5</sup> Ama yeye oye, u mema ya ku egbe-a abibi o rie li. U ri egbe mie osoli, ri abọ mu udu ini u wa a me osoli. Ke gbe akanya oyi oni ọ ri usomhi onete a tse abọ, u ri eloe shi ikanya eye e gbe abi oni ọọ ga oyi Eshinẹgba.

<sup>6</sup> Irari khi a she ku mhe abi onyo ni a ku shi iluasobo, ali oni ẹghẹghẹ o she bhale ni mhi rọ ya ghua. <sup>7</sup> Mhi she khọli oni okhọli onete, mhi she na oni unamhi pfo, mhi mu oni irudunga mhue ya to. <sup>8</sup> Mena, a shi ri arula iguẹ-ngeli shi na mhe, ni Onomhue ni ọ pfuase ni ọ khi oso-ezo ọ rọ ya na mhe ogbe na ẹlẹghọ. Ọa khi mhemheghuo tse a ya roli na, ama li shi ẹgbọ ni e nono inyene egbe bhale oyọli.

*IPolu ọọ ghie iTimoti usomhi*

<sup>9</sup> Roshẹka ni u keleş ramhi mhe egbe. <sup>10</sup> Irari khi iDemasi ọ mholi inono na oni agbo ona. O she tsua mhe pfa je ẹoli iTesalonika. IKiresenisi ọ she je eke iGalesha, iTatosi ọ je ẹoli iDalimatia.\* <sup>11</sup> ILuku luẹghuo kpe ọ ke leşe nu mhe la akana. Rue iMaki mholi obọ bhale, irari khi ọ mholi ikpaghiobo na mhe oni akanya.† <sup>12</sup> Mhi ghie iTakikosi je ẹoli Efesosi.‡ <sup>13</sup> Ini u wa bhale rue awulu ugbakpi ni mhi ro shi obọ oyi iKaripusi obini ẹoli iTiroasi ali ebe eyemhe mhue obọ bhale. Tete ẹkue ẹlamhi ni a keke emhi shi.§

<sup>14</sup> Alezada oni ọọ lumhi ikhuli, ọọ li mhe onobe gba. Onomhue ọ ya fali ọli ota shi emini ọ riẹle.\*

<sup>15</sup> Yeye li mu egbe ẹ shi ọli egbe, irari khi eri ọ lolo mu okhue vule shi usomhi ni awa ro ọ tse abọ ọ.

<sup>16</sup> Abi mhi ro kpe tode pfa egbe mhe shi eke, ọgbokhoghuo ọa nu mhe migha, eri wewe nya e na tsua mhe pfa. Eshinegba ọ khi roli mu ota so we. <sup>17</sup> Ama eri Eshinegba ọ migha kpesẹ mhe, ọ ri ekpabo na mhe ni a bhale ya ẹ khi, rote obọ oyemhe, oni ungmehi o lolo ze guele ni egbo iJeta e suo li. Ali ni a ro tsumhi mhe obọ oyi eghuli abine khi a mie ọgbọ unu oyi idumhi. <sup>18</sup> Onomhue ọ ya pfuese mhe okholi obe ni o vule shi mhe ọ, ali khi ọ ya rue mhe bhale iloghie oyoli tselele. Loli ọ mholi ufumhi ẹle na agboagbo ya je agboagbo. Atse.

\* **4:10** Li ze iKolo 4.14; iFile 24; 2 iKori 8.23; iGal 2.3; iTato 1.4

† **4:11** Li ze iKolo 4.14; iFile 24; Ika 12.12,25; 13.13; 15.37-39; iKolo

4.10 ‡ **4:12** Li ze Ika 20.4; Efi 6.21-22; iKolo 4.7-8 § **4:13** Li ze

Ika 20.6 \* **4:14** Li ze 1 iTimo 1.20; Iwolo 62.12; iRom 2.6



*Otse ni o kpe ukhokho*

<sup>19</sup> Tse iPisilia ali Akuila ali omhue-apfe oyi Onesiforosi na mhe.† <sup>20</sup> Erasiṭosi o la eoli iKoriti, ali mhi ze iTiروفimosi obọ shi eoli iMilētusi irari khi oọ ghua.‡ <sup>21</sup> Roshẹka ni u keḷe ramhi ana neni orue oọ pfi. Eubulusi oọ tse ali iPudenisi ali iLanusi ali iKilaudia, ali eni e miesuo nya e ga tse. <sup>22</sup> Onomhue o nu ayemhe oye la. Okhale oyi Eshinegba o nu e la.

---

† **4:19** Li ze Ika 18.2; 2 iTimo 1.16-17    ‡ **4:20** Li ze Ika 19.22; iRom 16.23; Ika 20.4; 21.29

**Ebe-No-Pfuasę Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

03be06b0-68fd-500b-b9a9-6bca4b63979a